



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

**US-i tenokdangba agienra onoki
atsüanem akatsü renema lir: Iran**

**Nottingham Forest nung
Pereira coach kümogo**

VOL. XXIII ISSUE NO. 124 (ADOK 124) DIMAPUR TENTONÜ (MONDAY) TSÜKLAI (FEBRUARY) 16, 2026

₹ 5.00

SAPO-i Maova nungeri inyakba aitsür

Dimapur, February 15, 2026 (TYO): February 13, 2026 nü Maova nungeri Chakhroma Public Organisation (CPO) President aser sensotem dak teka aiba aitsür ta Southern Angami Public Organization (SAPO)-i metetdaksüogo.

Ibala tesempatsü inyakba ya onok asoshi sobaliba tasen ka lir aser magizüker, kechiyong ibala inyakba ajanga asen loktiliba tamendakdak raksatsütsü ta Kuki nunger nem sangoktsü ta SAPO-i ashi.

Chakhroma sensotemi onok telongtet nung aliba yimtsüngtem den alemli nungi jungtepa lia arur. Onoki item tesem nung terenlok maparen inyakba ajanga Dimapur, Chumukedima aser Kohima district tem kanga inloka aoer ta parnokisa ashi.

Onokisa Angami Public Organization (APO) sangdong pusema nungiter aser ajak den timi liyonga agütsü ashiba asoshi tenüngsang agütsür ta SAPO-isa metetdaksü.

Onoki nisung ajak dang ali kibur chichibatam akhümtsübuttsü aser ozüng alema

inyaksangshiba anentsü ayongzüker. Kati ka akhümtsübuttepa, angatettepa aser putepa liyonga aotsüla. Ajisüaka Maova Kuki yimtsüngi chichiba ali kiburtemi terenlok mapa inyakba nung tsübua bilemra, nenok tanga tesem kati belena oang aser timi liang. Ajisüaka ozü li nung nenok ozüngtem yangur mebenshitsüla ta SAPO-isa ashi.

Maova yimtsüng nung Kuki nungeri Chakhroma Public Organization (CPO) president dak teka aiba dang masü saka district administration aser Chakhroma sensotem dak lung agi aon aser iba ya sorkar o public teloktem den rara menaba lir. Iba inyakba magizüker aser khukhua aitsür ta SAPO-isa metetdaksü.

Olemtep tajung alitsü aser nüngdak süra lendong maliba tesem kati belena aotsüla kechiyong iba ajanga dang alemli nungi putepa liyonga aruba ama lia otettsü. Onok Angami telongtet nung ibla inyakba nung noktangtsü asoshi onok yaritsü renema lir ta parnokisa ashi.

BJP national president-i Dibrugarh semdangtsü

Dibrugarh, February 15, 2026 (Agencies): BJP national president tasen Nitin Nabin-i February 18 nü Dibrugarh semdangtsü ta BJP state president Dilip Saikia-i metetdaksü.

Nabin-i February 18 nungi anogo ananü atema Upper Assam semdangtsü aser Khanikar nung Prista Pramukh Sanmela nung adentsü.

Iba sentong atema Saikia-i Deobarnü Dibrugarh semdanga maparen repringshio.

February 18 nü Nabin-i Dibrugarh tonga arutsü aser Khanikar field nung Prista Pramukh, sentong nung adentsü ta pai ashi.

February 19 nü Nabin-i

Tinsukia semdangtsü aser Matak king Sarbananda Singh indang Maidam nung tetushi agütsütsü ta Saikia-i metetdaksü.

"Nitin Nabin-i BJP national president akümba sülen tang mezüng atema Dibrugarh aser Tinsukia semdangtsü. Pai organisational programmes aika nung adentsü" ta Saikia-isa ashi.

Onoki BJP zonal meeting ka ayonga amentsü aser idangji district tenet nungi ti züngsemtem adentsü ta paisa shisem.

February 18 nü Dibrugarh nung Prista Pramukh Sanmela nung Union Minister Sarbananda Sonowal aser Assam Chief Minister Himanta Biswa Sarma na adentsü.

SC-i CBI dang Manipur status report meshir

Guwahati, February 15, 2026 (Agencies): Supreme Court-i Central Bureau of Investigation (CBI) dang hopta ana tsünga Manipu dak sendakba ken o tem status report agütsütsü tetuyuba agütsüogo.

Manipur nung 2023 kin o kin tsünga rara dak sendakba FIR 11 tashi CBI-i bushisüngdanga arur.

Chief Justice Surya Kant aser Justice Joymalya Bagchi na adenba bench-i ken o tem angadangba ya Supreme Court lenisüba kübok masü saka jurisdictional High Court nem agütsütsü akok ta shidangogo Manipur High Court mesüra

Gauhati High Court ajanga item ken o tem ketdangsüa repringtsü akok ta Bench-isa ashi.

Supreme Court-isa Centre aser Manipur sorkartem dang Justice Gita Mittal Committee ajanga rehabilitation and welfare report agütsüba mapa küma inyaktsü nenshiogo.

Supreme Court-i Justice Gita Mittal, Justice Shalini P. Joshi aser Justice Asha Menon nunger adenba committee ka tenteta liasü aser parnok nem Manipur nung kin o kin rara ajanga timtemertem asoshi relief and rehabilitation maparen asadangtsü nunglokja liasü.

CM Rio-i Ukhrul nung Lui-Ngai-Ni nüngshilung sayatsü



Ukhrul, February 15, 2026 (Agencies): Deobarnü Ukhrul Headquarters Ground nung Naga nungeri Lui-Ngai-Ni 2026 benjung kanga longsoa mungogo.

Iba benjung ya United Naga Council kübok State Level Organising Committee ajanga "Cultural Renaissance" omen nung ajemdaker ayongzüker aser Tangkhul Naga Long-i host asü. Nagaland CM Neiphiu Rio-i benjung nung tongti tesemdanger aser Manipur Deputy Chief Minister Losii Dikho-i tetushi süa jaoker ama shilem agi.

Manipur nung Naga nunger aliba tesem ajak nungi nisung meyrjang aika adenshia agricultural aser cultural festival nung denogo.

Tongti tesemdanger CM Rio-i Lui-Ngai-Ni 2026 nüngshilung

sayaja benjungmung tenzüker.

Lui-Ngai-Ni ya mongpu benjung ka dang masü saka alemli shisatsü aser külem maitsü nenshiba mapang ka lir ta CM Rio-i ashi.

"Asen oboula nungeri asen lima nung süngiang atemba dang masü saka külem tanülatem rema rema yutsü. Iba benjung ajanga asenok tesentaktep tasen kümshir aser tamang akangshir" ta paisa ashi.

Naga nungeri maneni yimjung aser putepa alitsü osang prokshitsü mepishir. Nübertemi ozüng alema inyakshishiba magizükttsü aser state ajungalen putepa alitsü atema aputem alatsü ayongzüker ta Deputy Chief Minister Dikho-ia ashi.

Iba sentong nung Tangkhul Naga Awunga Long President Kashung Tennyson-i metsüjang moatsüba aser alemba mapang

agia liasü.

Tennyson-i Naga kin 21 nungi teshimtet nisungtem nem metsüjang lema agütsü.

Benjung nung traditional fire-lighting competition nung Rongmei kini takok angu aser parnok nem Lui-Ngai-Ni torch tsüklokttsü tetushi agütsü.

Iba benjung tenzükerba sentong nung MLA Awangbou Newmai (52-Tamei ST), MLA Ramnganing Muivah (44-Ukhrul ST), MLA J. Kumo Sha (47-Karong ST), MLA Khashim Vashum (45-Chingai ST), aser MLA Leishiyo Keishing (43-Phungyar ST) nunger aden.

Lui-Ngai-Ni ya kümshia February 15 nü amunger aser iba benjung ya tsünüsenbongba asentenshi, alemli putu akhümtsübuttsü aser Naga nunger longjema aruba indang tongtipang maitsü ka lir.

Om Birla-i Bangladesh PM Rahman sentong nung adentsü

New Delhi, February 15, 2026 (Agencies): Bangladesh nung PM-elect Tarique Rahman-i February 17, 2026 nü tezüngzüktep agiba sentong nung Lok Sabha Speaker Om Birla-i India tenüng nung adentsü.

2024 küm taoba prime minister Sheikh Hasina atsüngdokba sülen Bangladesh nung mezüngbuba national election nung par party-i takok tulu anguba sülen Bangladesh Nationalist Party (BNP) chairman Rahman-i prime minister inyaktsü.

Bangladesh-i iba sentong

nung Prime Minister Narendra Modi jaokogo saka February 17 nü pai Mumbai nung France President Emmanuel Macron den senden amentsü sentong lir.

Om Birla-i iba sentong nung adenba ajanga New Delhi-i Dhaka den tesentaktep nung temulung agütsüba sayur. Iba ajanga kidanger ana tsünga külem democratic tangatetbatem aliba sayur ta sorkar sangdong ka nung metetdaksüogo.

Iba sentong nung Pakistan PM Shehbaz Sharif adentsü imlar. Bangladesh nung

Muhammad Yunus-i aniba interim administration ajanga India, China, Saudi Arabia, Turkey, United Arab Emirates, Qatar, Malaysia, Brunei, Sri Lanka, Nepal, Maldives aser Bhutan linüktem jaokogo.

Parliament nung menden 297 nungi BNP-i menden 209 nung takok nguogo aser küm 20 jungnüa süiba sülen sorkar akümtsü.

Rahman ya taoba Prime Minister Khaleda Zia'er jabaso lir aser pai küm 17 tashi London nung self-imposed exile nung liyonga aru.

Mizoram Health Minister-i Love Brigade 2.0 tenzükttsü

Aizawl, February 15, 2026 (Agencies): Mizoram nung HIV kanga menatepba atema tebilemttsü tulu abener aser iba ya Mizo nunger ajak asoshi maaktsü ka lir ta Health Minister Lalrinpuii-i ashi.

Aizawl nung International Condom Day sentong nung jembidang Lalrinpuii-i iba osang metetdaksü. Iba sentong ya Mizoram State AIDS Control Society-i AIDS Healthcare Foundation India Cares den yaritepa ayongzüker.

Mizoram nung HIV menatepba teimba shi nung medemba aser HIV puteter 70% tashi shi nung medemba ajanga

menateper ta lai ashi.

Mizoram nung HIV prevalence rate ji 2.74% lir aser iba ya national average 0.2% den kanga agi teimba lir ta Lalrinpuii-isa ashi.

Taküm azüoka maliba aser preventive measures mamshiba ajanga HIV prokshir ajisüaka item Mizo nunger tangatetba aser tamangba tesayubatem anema lir ta laisa ashi.

"World Health Organization-i HIV aser tanga sexually transmitted infections noktangtsü atema condoms amshitsü metetdaksüogo. Anungji nübertemi condom amshiba nung tai tangatetbatem

sendoktsüla aser timi amshitsüla" ta Minister Lalrinpuii-i ayongzüker.

"Asenoki kibong makümdang shi nung memedemtsü ajungshir saka shirnoki yamaji meliteter condoms amshitsü menungnangtsüla" ta laisa ashi.

Iba sentong nung Minister Lalrinpuii-isa Love Brigade 2.0 campaign tenzüker liasü aser iba ya condom access atema lir.

Iba campaign kübok unique distribution model ka tenzüker. Iba nung two-wheeler taxi riders-i condom jackets asemtsü aser passengers o public-i idak nung jagi condoms miima aser zübazüba agizüka amshitetsü.

NU Medziphema nung Youth Exchange sentong temogo



Ashtalakshmi Darshan - Youth Exchange Programme tembanga sentong ka multi-purpose hall, School of Agricultural Sciences, Nagaland University, Medziphema campus nung agidang tangokba noksa ka nung ketdangsürtem aser Kerala aser Ladakh nungi aruba kaketshirtem angur.

Dimapur, Tsüklai/February 15 (TYO): North Eastern Council (NEC) aser MDoNER, Government of India ajanga sponsor asüba Ashtalakshmi Darshan-Youth Exchange Programme tembanga sentong ka February 13, 2026 nü multi-purpose hall, School of Agricultural Sciences, Nagaland University, Medziphema campus nung agia liasü.

Ashtalakshmi Darshan-Youth Exchange Programme ya Ministry of Development of North Eastern Region (MDoNER) aser NEC sentong lir, koba non-North Eastern states nungi lanurtem arua North Eastern states ti den anogo 14 academic, sobaliba aser tesem balala semdanga sendaktepa "Ek Bharat Shreshtha Bharat" jenjang ajungketa linük telungjem nung alitsü, kati ka akumtsüboa sobaliba angatetteptsü mechi tenzükba lir, ta sangdong ka ajanga ashi.

Nagaland University indang Medziphema campus nung Kerala aser Ladakh nungi kaketshir 40 aliba batch 10 buba den tesayur pezü iba sentong nung shilem agia liasü.

Iba sentong ya Prof. J Longkumer (nodal officer), Dr. Kevineituo Bier, Dr. Sabbithi Pavan (nodal faculty), aser Peter Ki, PRO, Nagaland

University nungeri ketdangsüa agia liasü.

NEC ajanga mela aliba ama North Eastern states balala nung academic sessions agiba, sensaksem akaba, exposure visits aser cultural exchange sentong ayongzükba osang Prof. J Longkumer-i agüja liasü.

Kaketshir aser tesayurtem arua amungba mapang Nagaland aser North Eastern region indang sobaliba aser yimsü balala angazüktsü maongka agüja liasü.

Parnoki iba mapang Nagaland nung tongtipang tesem balala semdanga tejangja nisung aika ajuru, academic lectures nung aden, yimdak aliba takum yimya ajangshi, traditional weaving sayua nüburtem den sensaksema liasü.

Item sentong ajanga shilem agirtem North East India nung sobaliba, puti otsü aser terenlok maparen tajungba nung angatetdaksü, ta sangdong ka ajanga ashi.

Prof. Dipak Sinha, Pro Vice-Chancellor, NU Medziphema campus ajanga sentong ung jembidang teachers-in-charge aser kaketshirtem dang pei institutions nung workshop ayongzüka North East India nung ajangshiba indang lemsatepa kaketshir timba nem region indang tali angatetdaksütsü ajungshia liasü.

Pai parnok dang parnoki

angazükba social media sapang tem nung lemsatepa tangatetba tajung nung 'racial discrimination' ajemdaksüba nung yaritsü ayongzüka liasü.

Prof. L Tongpang Longkumer, Dean I/C, School of Agricultural Sciences, NU ajanga iba sentong nung shilem agirtem dang nenok ya North Eastern Region indang ambassador lir ta ashi aser parnoki ajangshiba kodanga mamadoktsü ayongzüka liasü.

Neipusimeu Yalie, Ph.D. scholar, Department of Agricultural Economics ajanga presentation ka agütsüba sülen Watisenla Longkumer, Ph.D. scholar, Department of Agricultural Economics ketdangsüba nung kulizüng kaketshir lema agüja liasü.

Kerala aser Ladakh nungi tesayur aser kaketshir temia parnoki ajangshibattem lemsatepa parnok anepalua mungdaksüba asoshi pelaba lemsatepa liasü.

Sentong nung Dr. Sabbithi Pavan, Assistant Professor, Department of Entomology ajanga pela agizükba o jembia aser EU choir ajanga temeja ken ka tena liasü. Iba sentong nung Dr. Kevineituo Bier, Assistant Professor, Department of Soil Science, NU menden liasü aser Peter Ki-i melepzüng o jembia sentong tembang.

Avakhung nung Trade Expo 2026 takok ngua agiogo



Dimapur, Tsüklai/February 15 (TYO): Department of Industries & Commerce, Govt. of Nagaland ajanga Meluri district kübok Avakhung nung February 12, 2026 nü Trade Expo 2026 takok ngua ayongzüka agiogo, kong local entrepreneurs, shishilempar, aluyimer aser artisans temi shilem agia liasü.

Yimdak yimtsüng nung shishilempaba jenjang ajungkettsü, entrepreneurship ajungmesotsü aser region nung rongsenketzüng inyakyim tashi itshtitsü nükjidong nung iba Expo ya yangjir alirtemi anepalua ayongzüka liasü.

Iba Expo nung Phokhungri Area nungi nüburtem, District Administration, Assam Rifles, PAPO ketdangsürtem aser Meluri district nung temeket yimtsüngtem nungi tejangraba tulu nung adenshia shilem agia local level nung shishilempaba tesendaktep tali tajungba kumdaksü.

P. Tokugha Sema, Director of Industries & Commerce, Govt. of Nagaland ajanga iba sentong nung jembidang, Trade Expo 2026 ya arütsülen shishilempaba aser rongsenketzüng tashi itsi

tenzükba, nüburtem takum jenjang tajungba akumtsü maongka aser pei sasa pei peria alitsü ajungketba mapang ka lir ta ashi.

Stalls balala lapoka osettsüset tabu aika sayua region nung sobaliba aser rongsenketzüng tsütsü teimla aliba sayua liasü.

Shishilempar, entrepreneurs, aluyimer aser artisans asoshia departmental scheme nung special awareness session ka ayongzüka liasü. Iba mapang Cholzo Sophie, Joint Director of Industries & Commerce ajanga Chief Minister Micro Finance Initiative (CMMFI) Scheme; Dapunyi Zholia, FM, Sub-DIC Meluri ajanga Prime Minister Employment Generation Programme (PMEGP) aser Pradhan Mantri Formalisation of Micro Food Processing Enterprises (PMFME) Scheme; aser Imsongmeren Imsong, Inspector of Industries & Commerce ajanga Export Procedures aser Pepenthung Lotha, Consultant, PIU UNNATI-2024 ajanga Uttar Poorva Transformative Industrialization Scheme (UNNATI-2024) indang tejangja lemsatepa liasü.

Film Association of Nagaland-i Screenwriting workshop ayongzük



Dimapur, Tsüklai/February 15 (TYO): Film Association of Nagaland ajanga Conference Hall, IPR Citadel, Kohima nung February 9-13, 2026 anogotem Screenwriting Workshop ayongzüka liasü.

Züngsemtem aser filmmakers kumner tem nem otsü ashiba aser screenwriting skills sayutsü nükjidong nung iba workshop ya ayongzük.

Ajaki kanga jangja meteta aliba screenwriter, producer, director, tesayur, performer aser Element 79 Films tenzüksang Munish Bhardwaj iba workshop nung shisalen sayur ka ama liasü.

Iba sentong nung shilem agirtem nem screenwriting indang yimya balala angazükdaksü, kong cinema indang oshi, tasa, otsü, setting, visual thinking aser screenplay, theme, premise, screenplay structure, scene züluba, dialogue züluba, series easer feature films atema züluba, short films atema züluba amala yimyatem pai lemsatepa liasü.

Iba workshop tatemi sensaksemba, asüngdangba aser langzüba session agia shilem agirtemi shisalen sayurtem den mangatetba yimya aser inyakyim asüngdanga rajemtepa liasü.



PM Vishwakarma Scheme indang awareness sentong ka Heritage Hall, Zungeboto nung agidang tangokba noksa ka nung General Manager, DIC, Zunheboto, Er. N. Toky Chishi den ketdangsürtem aser shilem agirtem angur.



February 15, 2026 nü Munich nung India External Affairs Minister S. Jaishankar aser American Jewish Committee (JC) CEO, Ted Deutch na senden amendang tangokba noksa nung angur.

Bangladesh PM tenangzükba agiba sentong nung Om Birla adentsü

New Delhi, February 15 (Agencies): February 17 nü Bangladesh yimtiba, Dhaka nung nung BNP tongti, Tarique Rahman-i Ato kilonser tenangzükba agitsü, aser iba sentong nungji India tenüng nung Lok Sabha Speaker, Om Birla adentsü.

Lok Sabha Speaker Om Birla den India Foreign Secretary Vikram Misri-a alitsü.

Amongnü Ministry of External Affairs-i sangdong ka ajanga, "Iba ama kanga tongtiband sentong ka nung Speaker shilem agidaktsüba ajanga India aser Bangladesh nüburtem tsüngda tesendaktep junga aliba sayur," ta metetdaksü.

Iba sentong ya National Parliament nung aliba South

Plaza nung agitsü.

Tawa Bangladesh General election nung BNP-i takok tulu ngua liasü.

Ato kiloner tenangzükba agiba sentong nungji adentsü atema Bangladesh-i India densema linük 13 nungi lenirtem jaokogo.

Election commission-i ashiba agi, tang tashi nung sangdongba menden 297 nungi BNP-i menden 209 nung takok nguogo aser menden ana anenja lir.

BNP den teloktep party temi menden asem nung takok angu, anungji BNP-i aniba teloktepi menden ajak senteperbo 212 nung takok angu. Bangladesh Jamaat-e-Islami-i menden 68 angu aser parnok den teloktep party temi menden 11 angu.

Iba election nung BNP-i

takok anguba sülen Ato kilonser Narendra Modi-ia social media ajanga Tarique Rahman nem tenüingsang agüja liasü.

2024 küm August ita nung Bangladesh nung nüburtemi longkak aita Sheikh Hasina-i aniba sorkar atsüngdokba sülen India aser Bangladesh na tsüngda tesendaktep raksar liasü.

Tang Sheikh Hasina India nung jenoka lir.

Bangladesh nung sorkar atsüngdokba sülen Hindu nunger densema minorities anema inyakba tatalokba kanga bulua aküm, ajisüaka tang sorkar tasenba kübok tensa tajungba küma India aser Bangladesh na tsüngda tesendaktep tajungba akümtsü imlar.

Rohit Pawar-i tayimtsü tsükokba junga bushisüngdangtsü mepishi

New Delhi, February 15 (Agencies): NCP (Sharad) MLA, Rohit Pawar-i, pai shidi ka ajanga Union home minister Amit Shah dang January 28 nü tayimtsü tsükokba tatalokba jungjunga kanga teladak süa bushisüngdangtsü mepishiogo, ta metetdaksü.

January 28 nü atalokba lendong nungji Maharashtra Deputy Chief Minister, Ajit Pawar densema tayimtsü nung mena alir nisung ponguprong asü.

Iba lendong atalokba sülen West Bengal chief minister Mamata Banerjee-ia, iba nung ya yimtenren dak sendakba asalentong ka lir, ta shia Supreme Court-i ketdangsa iba tatalokba bushisüngdangtsüla, ta takhangba agüja liasü.

Rohit-i, "Ni iba takhangba

agütsüba ya yimtenren den kecha sendaktepa mali, ajisüaka iba lendong atalokba kuli tejangja metettsü nükjidong nung lir," ta metetdaksü.

Rohit-i X ajanga, "Ni Shah, civil aviation minister, Kinjarapu Ram Mohan Naidu aser Director General of Civil Aviation nunger majurutet, anungji ni email ajanga iba lendong dak sendakba nung tasüngdangba balala parnok nem metetdaksüogo," ta ashi.

Rohit-i iba takhangba agütsüba dak sendakba nung tang tashi nungbo NCP tongti Sharad Pawar aser par jala Lok Sabha MP Supriya Sule nungeri kecha memetetdaksü.

Ajit Pawar iba lendong nung asüba sülen pa kinüngtsü Sunetra Pawar-i deputy chief minister tenangzükba agiogo.



February 15, 2026 nü Rudraprayag district nung sepaitemi Kedarnath tekülem ki anükba noksa nung angur. Uttarakhand kübok Garhwal Himalayas nung aliba tekülem ki ya ita trok shibangba sülen Hindu nunger tamangertem atema April 22 nungi lapoktsütsü.

Senden nung Congress-i timtem agütsüra parnoksa akoksatsü: Rijiju



New Delhi, Tsüklai/February 15 (Agencies): Amongnü Union Parliamentary Affairs Minister, Kiren Rijiju-i, Lok Sabha Speaker Om Birla anema benoka aliba 'no-confidence motion' atema March 9 nü o lemteptsü, iba sülen vote agütsüteptsü, ta metetdaksü.

Rijiju-i, Budget senden tanabuba shilem March 9 nungi tenzüka April 2 tashi amentsü, aser iba senden ya jangratemtsüka asütsü, kechiyong kanga tongtiband ozüng aika benoktsü aser bill aika benoktsü, ta metetdaksü.

Paisa, taoba senden nung

atalokba ama opposition party temi maneni timtem agütsüra, ibaji parnok atema takoksa asütsü, ta metetdaksü.

Rijiju-i, o lemtepba nung opposition-i shilem magira parnok dang akoksatsü, ta ashi.

Opposition telongjem raksatsüa akok, ta shia Rijiju-i, Lok Sabha Speaker anema benokba no confidence motion nung Trinamool Congress-ibo sign masü, ta ashi.

"Party tila aikati senden nung rongrong madokdaksüner. Talisa assembly elections jakdang parnoki parnok tebilemstü onüktem benokner," ta pai

metetdaksü.

February 2 nungi tenzüka Budget senden mezüngbuba shilem nung Lok Sabha senden aiben junga magiteti liasü.

Talisa senden nung taoba mapang army tongti, M M Naravane-i züluba kaketi nungi oren kar jembitsü atema Congress lenir Rahul Gandhi nem temelaba magütsüba nungi mangatetep adoka liasü.

February 4 nü Ato kilonser Narendra Modi-i Parliament nung jembitsü liasü saka opposition-i longkak aitba nung ajemdaker pai mejembi.

Tesülen Speaker Om Birla-i, Congress MP tem aikati Ato kilonser menden anasa longkak aittsü tebilemba pai metetba ajanga pai Ato kilonser Modi dang sendeni marutsü mepishia liasü, ta metetdaksü.

Senden mezüngbuba shilem nungsa senden nung timtem agütsüba agi opposition MP 8 senden piyong anenja liasü.

Opposition party temi Birla Speaker menden nungi anentsütsü atema 'motion' benokba sülen taoba hopta pai senden ketdangsüa magitsü telemetba agi.



पावरग्रिड
POWERGRID

SANGDONG

North Eastern Region nung "West Bengal kübok Northern part nung pooling station terenlok atema Transmission system aser Bhutan nungi North Eastern Region nung NRWR tashi power transfer" kübok 2019-24 atema Transmission tariff melenshütsü aser Assets atema 2024-29 tariff block asoshi transmission determination atema temepishiba meshir.

1. Temalen agüja aliba Transmission system ajanga tajangzük angutsüptemiji: (1) TNPDC (2) KSEBL (3) Electricity Dept. of Goa (4) Electricity Dept. of Puducherry (5) APEDCL (6) APSPDCL (7) APCPDCL (8) TSSPDCL (9) TSNPDCL (10) BESCOM (11) GESCOM (12) HESCOM (13) MESCOM (14) CESC (15) MPPMCL (16) MSEDC (17) GUJVNL (18) Electricity Dept. of Goa (19) DNHDD PDCL (20) CSPDCL (21) Ajmer Vidyut Vitran Nigam Ltd. (22) Jaipur Vidyut Vitran Nigam Ltd. (23) Jodhpur Vidyut Vitran Nigam Ltd. (24) Himachal Pradesh State Electricity Board (25) Uttar Pradesh Power Corporation Ltd. (26) Haryana Power Purchase Centre (27) Jammu & Kashmir Power Corporation Ltd. (28) Punjab State Electricity Corporation limited (29) BSES Yamuna Power Ltd. (30) BSES Rajdhani Power Ltd. (31) Tata Power Delhi Distribution Ltd. (32) Uttarakhand Power Corporation Ltd. (33) North Central Railway (34) New Delhi Municipal Council. (35) Chandigarh Electricity Department (36) Bihar State Power (Holding) Company Limited (37) West Bengal State Electricity Distribution Company Limited (38) Grid Corporation Of Orissa Ltd (39) Damodar Valley Corporation (40) Power Department, Govt. Of Sikkim (41) Jharkhand Bijli Vitran Nigam Ltd. (42) Assam Power Distribution Company Limited (43) Meghalaya Energy Corporation Limited (44) Government of Arunachal Pradesh (45) Power and Electricity Department (46) Manipur State Power Distribution Corporation Limited (47) Department of Power, Nagaland (48) Tripura State Electricity Corporation Limited (49) Sembcorp Energy India Limited (50) GMR Kamalanga Energy Limited (51) MB Power Limited (52) DB Power Limited (53) Sembcorp Energy India Limited (54) Sembcorp Gayatri Power Ltd. (SGLPI) (55) ACB India Limited (56) GMR Warora Energy Limited (57) Jindal Power Limited (58) Spectrum Coal And Power Ltd (59) Torrent Power Limited (60) TRN Energy Private Ltd (61) Dans Energy Pvt. Limited (62) Shiga Energy Private Limited (THEP) (63) KSK Mahanadi Power Company Limited (64) Arcelor Mittal Nippon Steel India (Essar Steel) (65) Gati Infrastructure Limited (66) GMR Bajoli Holi hydropower Pvt. Ltd.

2. Tariff osang tejangja:

a) 2019-24 block				Rs. In lakhs				
Asset detail	DOCO	Completion Cost as on 31.03.2024		2019-20	2020-21	2021-22	2022-23	2023-24
Asset - 1	01.03.2018	612.27	Revised AFC based on truing up	139.61	142.38	141.20	141.63	142.78
Asset - 2	21.09.2017	393869.05	Revised AFC based on truing up	55411.69	55134.00	54433.55	55193.72	56485.98
Asset - 3	21.09.2017	35080.92	Revised AFC based on truing up	5,919.45	5,830.69	5,717.84	5,644.20	5,578.15
Asset - 4	03.07.2019	31091.08	Revised AFC based on truing up	3,887.15	5,117.01	4,985.66	4,884.97	4,790.21

b) 2024-29 Block				Rs. In lakhs				
Asset detail	Completion Cost as on 31.03.2029			2024-25	2025-26	2026-27	2027-28	2028-29
Asset-1&3&4	67243.45	AFC		10141.41	9952.27	9742.00	9521.51	9290.82
Asset-2	397311.6	AFC		56339.35	55365.90	54392.59	53132.99	51995.69

3. Determination of tariff atema application copy ka www.powergrid.in nung applicant indang website nung angutsü.

4. Petition nung aliba determination of tariff nung tebilemba mesüra tashishiba kar danga lira beneficiaries densema nisung mashie kail Commission indang e-filing portal mesüra tezüluba nung Secretary, Central Electricity Regulatory Commission, 6th, 7th & 8th floor, Tower B, World Trade Centre, Naoroji Nagar, New Delhi-110029 nem (mesüra Commission indang office aliba tanga address nung) agütsütsü akok, aser copy ka petition agütsü nem iba sangdong agütsüba sülen anogo 30 tsüngda corporate office indang address nung agütsütsüla.

Place: Gurgaon
Date: 11.02.2026

Sd/-
General Manager (Commercial)

POWER GRID CORPORATION OF INDIA LIMITED
(A Government of India Enterprise)
Corp. Off: "Saudamini", Plot No.2, Sector-29, Gurugram-122001 (Haryana), Phone: 0124-2822999, & 2822000
Regd Office: B-9, Qutub Institutional Area, Katwaria Sarai, New Delhi - 110016, Phone: 011-26560112, 26560115 & 26560193;
Website: www.powergrid.in, Email ID: investors@powergrid.in, CIN: L40101DL1989GOI038121

A Maharatna PSU



TIR YIMYIM YIMOBILEM (EDITRIAL)

DIMAPUR MONDAY, FEBRUARY (TSÜKLAI) 16, 2026

Tama-tesü aser Tesü-tama !

Nagaland nungi tangaleni kechisarina oset aser chiyongtsü ayoktsü asoshi bener yoktsü atema state government-i kanga ajungshia 'Export' maparen indang angazükdaktsütsü asoshi sentong tajung ayongzüka agir. Ano, iba denji Longwa, Pangsha aser Avakhung nung tangar bendanger kintem den shishilemba mapa tenzüksü asoshi International Trade Center lapoker. Ibaji dang masü saka state government ajanga Agriculture, Horticulture, Land Resources aser Forest department-tem ajanga aluyimertem mapa nung yarisema lenmang lenjem tesem tesem nung aonsutsütem ayokdak ki yanglua toktsür. Ajisüaka, kodang itemji asenoki jungjunga bilemdangdir, mezüng asütsüba mapa tesü aser tesü asütsüba mapa mezüng ta langkoshishi meso ama asenoki angatettsü, kechiyong tayoktsü mebushi aser meyanglu ser kechi ayoktsü bilema tayokdak yanglutsütsü ? Ibai asenoki kanga mebiledmangi tenüng agi inyakba mapa aika rongnung ka asütsü. Aji oda, tanü asenoki bilemdangtsü asoshi yangi tayoktsü maka ser tayokdak kiojen yanglur menendokba indang jembir dang ashi, iba ama mesükba mapatem nung senotsü endoka kiojen yanglur mamshitet toktsüba aika lir. Ashiko, government kübok department balala nung kiojen yangluba mapatem nung ya teyanglurtem asoshi tajangzük kanga lir südi, iba jagi kiojenji nübortem nüngdak nung tajangzük lia amshitsü atema masü saka kiojen yangluba nung tajangzük aketbaji agizüka agitsü tangatetba aser nükjidong nung tuluba nungi tilaba tashii Nagaland nungbo kiojen yanglutsü jangrateper südi ta angateter. Atangji, Nagaland ama peisasa kecha mesütetba state ka asoshi nüngdak meperitet yur nüngdak makaba mapa nung senotsü endokbaji matong ali nung teptok amai lir. Iba ama pei lima aser nübortem ajangzükdaktsütsü mebilemi, pei ajangzüksü asoshi dang bilema tulubaia aser tilabaia inyakba ajanga Nagaland tejakleni moutet rajang küma asenok timatemer. Aji oda, asenok ket nung tayoktsü kecha maka ser tayokdak ki tama yanglubaji toktsür, asenok nütsüng nüboa mali aser mapa teinyaktsüa mali ser Nagaland nung district tasen-ang kümpet kümyonga aoba mapa yagi asenok tipatemtsü masü saka timang tali atemtsü aser tajangzük masü takoksa-ang angutsü. Atangji, shitakba nungbo Nagaland nung ya district ishinba akümstüba dang temsüa lir, saka asenoki district akümbaji terenlok mapa kanga tuluka inyaktet amai bilemer. Ajisüaka, tangarbo alinük aser mapa agi dang masü saka nütsüng nübo agi abensa nung dang district akümer. Aji oda, asenokbo tesüba tama aser tamaba tesü ta asütsü bilema inyaker amai inyaker asünungji, nisung mali ser office yanglua toktsür, tazünger mali ser yimtsüng ajak nung Govt High School lapoka toktsür aser mapa mali ser inyaker shima toktsür. Ibaji asenok kolok aser asenok tangatetba lir. Aji oda, kecha repranga senzüdak maka aser amongtsüa menüngdakba tesem nung asenoki raliwalirtem anendak yanglua toktsür. Ibaji kechiba (?) ta asenokbo khi jungjunga bilemdanga asenoki inyakba terenlok mapatem aser item sentongtem indangji khi bilemdangtsüla. Tangarbo asangsang nung ita petinu nung kiojen yanglutsü asameyanger saka asenokbo ali nung auyi mezüa pongmang nung kazür. Aji oda, tanü asenoki nüngdak makaba nung government kiojen yangluba aser mapa inyakba nungi senotsü tajangzük tera agibaji pongmang nung takar akümer amai bilemdi, kechiyong item ama rongsenji magishir aser magishitsü. Joko, asenoka asangsang nung pei lima aser nübortem ajangzükdaktsütsü bilema tayokdak tama masü saka tayoktsü indang tama bilema nübortem nem aluyimdaktsütsüla aser mapa tapu balala inyak angazükdakja anitettsüla, Kasaji, nübortem tenüng nung nüngdak makaba mapa ka inyaker pei asoshi senotsü ajangzüksü bilemba tejen aser ochimashiba mapa endoker, nübortem tama, ni tesü ta asüba shisatsü aser tangatetba dangi meyiptsüla. Iba jagi dang Nagaland state-a tangar state mesüka terenlok sentong tama-tesü meteta yanglua inyaktettsü.

OLEMSABANG

AKÜMLIR MONGJEN :

- Talitemjen Imchen

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yash adok nungi...)

Putu mapang ji, kija alir takar akümba otsü mejembir. Iba nung medensür pa sensakpu aküm. Yimertem-i pa den jungtepa alitsübo doktsür, kipoksemtepba mali. Kinüngertem-ia pa den asetaponga alinungbo, pa ama timtema alitsü saloksara süalir ta bilemer, ketasena kipoksem mali yutsü. Yimer-i pa sendoka linüba ji, paia ajiteta amalitepa alitsü atsüayunga aküm. Pa den jembitepa külemi alir nisung mali, pa asoshi yimer oshi tashi, samatsüsa mapangi bener aru. Pai oshi mesamatsü mechi, kidang chipo aonpo aser meshi den jembir. Kima nung kiset shiruru Ak aser An den jembir aser alu nung aluoset den jembia ali. Kisüng nemnema, item den jembiba jagi pa melungsüngzük angu. Kenübo pai nemnema jembiba ji, kar-i langzür ama angashi. Saka aongmetang arur alitsü ta dang bilemer doktsü. Liyunga arudang akhi yimya dang nungi tali, pa den külem-i kar ali ama, kija süaka azüngmeyak mesüi longsolongbena temeküt ji aliba pai angatet. Züngpong tendanga ata nung, pai tenük agi menguaka pongmang aser asangsang nung sayatenya balala ajuruba, tali jangjashia meteta aru. Pa aolen ajak nung, pa dang nungi tuluba kati anidaker aser kodanga medoktsüi pa den teti alir ta pai bilem. Pa anasa teti lijendang aliba agi, pai Lijaba ta tenüng aja. Pa inyaksangshi, jembishinü mapa ajak nung Lijaba-i angur ama bilemer miimshia alitsü lenmang mali ta meteta aküm.

Joko pa kolen senzüdir mesüra kechi inyakdir, "Obou ni iba jagi aor, Obou tanüa ibaji inyaker" ta pa aolen aser inyaktsü alibatemi, Lijaba nem tama metetdaktsü. Yamaji libaliru nung Lijaba tuluba südaktsür arudang, Lijaba-ia pa den jembir ama, arakzüyim aser yimyakoyatem ji tali tejangjaba nung sayu. Yimertemibo lokti nung mezüngokba taküm sangremer ka ta dang züngshir, saka yimti nung jangratema tepela agi sünger aliba takümü Tiapetzük aküm. Lialiabo kibongi Lijaba ji anioker külemi alitsü melungteta, pai tamang ayu. Achi ajemtsü nung kechi chiyungtsüsa renemdir, akümstüba Lijaba nem agütsür ama, tama chi tila ka aser aon tila ka kenteter, "Obou na tama chiang" ta shir meshi mesüra tsükdendak yutsü. Pa kolenisa odir külemi senzür ama "Obou arung külemi odi" ta jembia oliora ajak nung külemi senzüa mapatemji inyak. Lijaba kibong-i anioker külem-i aliba yimya tasenji ngua, yimertem-i pa atalaa menütsü, aser mangpumangyimer nisung ta tetlatetshi. Saka yimertem-i pa tetlatetshibaji doktsür, pai Lijaba dak tamang takang ayu. Yamaji kibongi Lijaba anioker, joko pa kisüng azüngmeyak mesüi, Lijaba dak tamang yur, temelung sadoka ali.

Lijaba anioker mapang tatsüka nung, Lijaba-ia pa moatsütsü tenzük. Kidang pai mesüba kiset shirururtem jenti züina aküm. Alu tsünüsempontsütem nung tejang jenti dangtsü. Ibaji dang masü, aier tepur tajung tenüng agi Sangrona den pa meimtepa aküm. Tiapetzük asangur masü, küm nung tain, aierla tena yungtsü nung ongdang lir. Saka Sangrona-i pa sakloka meimba ji, la jembishinü aser libaliru nungji, pai tangu dang. La tsürabur-ia, yimti nung asangur tepur tajung asoajen apetasong maküt jenti liaka, la Tiapetzük den lidaktsünüba ji tuluba. Tetsürla aser tebursang kinünger tsütsü nungia, tena kijema lidaktsünüba ji kanga süteper. Tiapetzük kibong akümstü asoshi, putu yimya ama asükwa tsüngküm mapang, ki tuluba küma sülok. Alu tuluba ayim aser kisetoset ajak sangremer yimya nung masü, kibong tasen akümstüba yimya nung renemshi. Meyiwa tsüngküm mapang, joko alu nung tsünüsempontsütem yuker külen, Sangrona kidangi anioka, tena kibong tasen ji tenzük. Tiapetzük aser Sangrona, tena kibong kümer liaka, akhi ama Tiapetzük sangrema aliba mapang Lijaba den koma ali, pai kasa tamang aser inyaksangshi nung, Lijaba akhümstüba benshi. Lijaba-ia kasa remso (temoatsü) nung Tiapetzük-er kibong ajongket.

Kibong-i Lijaba anioker alir asünung, tenati inyakbatem nung dang masü, tenati aginüba ama nebener küma jalajabaso moatsü. Lajar taküm kibong lanu süaka, yimti nung nebener kibong menepa, par kibong-a takataiter kibongtem nung züngshi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Actress Jen Lilley-i mangdang ka ngua ministry tenzüker



February 15, 2026: Hollywood actress, Jen Lilley-i, lai Tanela Temeshi ajanga mangdang ka anguba sülen ministry tenzüker, ta metetdaksü. Osangbener den jembidang lai, "Ni tanela mangdang ka ngua college campus aika nung temeremso tzüsem angu, iba

sülen milak aser Tanela Temeshi revival angu," ta ashi. "Iba mapang nungji ni Kibuba dang, 'Kibuba, ya kechi?' ta asüngdanga liasü. Iba mapang nungji Pai kü nem iba nüngja 'Wake Up Your Campus' agütsü," ta lai metetdaksü. Ajioda Jen Lilley-i March 29, 2026 nungi tenzüka hopta pezü

college tour tenzüksü. College campus ministries 33-i iba campaign ayongzüksü atema tejangraba lemsatepogo. US tesem balala nung aliba college campus tem nung UniteUS sentong agiba ajanga kaketshirtem aikati Khrista agizükba mapang ka nung lai iba ministry tenzüker. Tan ita nunga University of Central Florida nung ayongzükba UniteUS sentong nung kaketshirtem meyrjang aika aden aser kaketshir 1,600-i Khrista agizüka liasü. Tawa Jen Lilley-isa lai züluba kaket- anogo 365 devotional, "Wake Up Your Faith" sayaa liasü. Campus ministry dak sendakba nung lai campus balala nem jelia lai züluba kaket agütsüba den külemi campus shia nem 'pink tickets' agütsüogo. Campus tour nung adentsü atema katetshirtem ajungmesotsü nükjidong nung College campus shia nem pink tickets 40 agüja item ticket ji campus temeket nung miima yuja lir. Item tickets angurtem nem senpet \$1,000 agütsütsü.

Uganda nung Muslim nungertemi pastor ana dak azük



Pastor John Michael Okoel mozü-kidang amongdang tangokba noksa nung angur.

February 15, 2026: Uganda nung Pastor John Michael Okoel aser pa indang assistant pastor na dak azükba sülen tena mapang talangka hospital nung among aser taoba hopta nung ang hospital nungi 'discharge' süogo. Pastor John Michael Okoel aser Assistant Pastor Abraham Omoding na ya Kampala nungi mile 120 shi pilar aliba Pallisa nung New Life Church nungi lir. January 30 nü tena aonung piyong sarasadem sentong ka nung adenba sülen anepdang 4:00 ako meta meyipa aoba mapang nung Muslim nunger nisung pongui Pallisa-Mbale Highway nung tena nokdanga liasü.

Pastor Okoel-i, "Muslim nungertem jagi küna dang nenoki Tsüngrem mezüngmeshir aser Muslim nungertem Khristan yimsü dangi meyipdaksütsü meranger ta ashi," ta metetdaksü. "Parnoki küna dang, nenoki Allah tsüngrem indang yazü jembir, aser Allah jabaso ka lir ta shia Muslim nungertem Khristan yimsü dangi meyipdaksür ta ashi. Ni telangzüba agütsütsü lia parnok rongnung Ali Kitaali-i kü dak maaoktsü, iba sülen kü dak azük tenzüker," ta pastor-i metetdaksü. "Iba sülen parnoki assistant pastor dak-a azükba ajanga pa teka sükdang, tepo ana lokdok

aser kanga mejungi azük," ta Pastor Okoel-i ashi. Iba mapang nungji gari ka aruba ajanga Muslim nungertemji jenshia liasü, ta pai ashi. Gari nung mena alirtem jagi pastor anaji gari nung anioker anasa aliba clinic kati anir ao. Tesülen kinüngertem aser Arogo nung züngsemtem arua tena Mbale Regional Referral Hospital-i anir ao. Taoba hopta (February 8) tena hospital nungi discharge süogo. Tena temang tajungba akümba sülen tenati police ajurua ken o benoktsü. Pastor kati ketdangsertem dang iba tatalokba ya jungjunga bushisüngdangtsüla, ta takhangba agütsüogo. Paisa, "Pei tamangba yimsü atema yimsü lenir shinga tetsübu nung malitsüla," ta pai ashi. Pallisa nung alir kati, "Iba tatalokba ajanga Khristantem kanga aoksatepogo. Item ama tatalokba nokdangtsü atema kecha meinyakra ibaji ajanga nüburtem tesünep nung aliba tensa raksatsütsü," ta metetdaksü. Uganda linük temzüng ajanga yimsü temeden agütsüba dang masü saka pei yimsü tangar den-a lemsateptsü atema melar. Uganda nung nütsüng shilem 12 dang Muslim nungertem lir, ajisüaka anüdoklen tsütsü Muslim nungertemi mapang shia Khristantem anema inyaker.

ANOGO ABEN TSÜNGREM DEN

Ajak bendanga agütsür

"...Pai pei mulungba inyaksü; tajung ajak nung perijang; Pa dang sentsü wangshi teti tatem maka sang. Amen". Ibri 13: 20-21. Tsüngremi asenok dak mapa inyaker. Aseni mamangba ajanga tetsükdaksü adokaka, Tsüngremi mapa inyaker, kechiaser aji pai mulungba. Tsüngrem nükjidongji asenok tashi (mature) küma indaktsütsüba lir. Tanur sor temangji tazüokba aser angazükba ajanga melenshia ainer, saka telunglen jaklabo telunglen maneni ainer. Tsürabur nungi anguba takümüji terenlokba agi azüoker. Khrista ajanga Tsüngremi agütsüba taküm Tsüngrem peladaktsüba mapa agi azüoker. Khristan aikati alima libaliroji Khrista mesük taküm den medemdanger. Jilu aiba agi Khrista mesük takümüji adokdaksütsü makok, saka telunglen taküm melenshiba agi adokdaksür. Tanur ka ku temeru aser teküp sentsü temesüng aso, kechiaser tebu dak itemji keta liasü. Asenok dak Khrista shiba alir Pa dak aketba yimya keta alitsüla. Kibubai asenok Pa mesüka kümdaktsütsü asoshi mapa inyaker, koba asen shi taküm agi angutsü akoker. Atangji asenok dak Adam taküma alir koba shimsü asenok mulung. Shia aruba Khrista dak temenen yimya akoktsü ain tashi lir. Tsüngrem nem bendanga agütsüba ajanga asenoki takok angur. Khrista mesük asen mulungjang nungi adokdaksüba taküm jaklaji Tsüngremi agizüker.

Wukari nung Arogoi ketdangsertem dang Khristantem kümzüksü mepishi

February 15, 2026: Nigeria nung aliba Wukari nung Catholic Arogoi ketdangsertem dang Khristantem kümzüksü atema security peria agüjang, ta takhangba agütsü. Khristantemji pei kibong mesütsü atema alu arühtsü asoshi alui aotsüsa akümer, ajisüaka iba mapang nungji Fulani teloki amaker. Arogo nung lenirtemisa, "Khristantem meshimeshia samatsütsü nükjidong nung parnoki amaker," ta metetdaksü. Taraba State Government aser security agency temi Karim Lamido, Sarkin Kudu aser Rafin Kada-Takum road corridor nung security agütsüba atema Arogoi pelar, ajisüaka Chanchanji, Takum, Ussa aser Donga nunga security peria agütsüdaktsüner, ta parnoki mepishi. Arogo lenirtemi, Khristantem kanga bulua amakba tesemtem nung tangsa security sepaitem peria lemsütsütsüla aser aibelenertem pua ken o akatsüla, ta takhangba agütsü. Arogo lenirtemi, "Tang jenshia alirtem (internally displaced persons) nem chiyungtsü, medical teyari, anepongi aruba sülen Khristantem kiojen, tsük aser Tenla kitem rongdoktsür, ta metetdaksü. Tang tesüsa February 10 anepdang 5:30 ako meta Mchia yim amakdang Khristan 10 dak tali tepset aser ki aika raksaja liasü. Khristantem amakba dang masü saka Khristantem meyong alu rakzüker. Jenshiba

AO OSHI ANGAZÜKDAK:**TANÜ ANGAZÜKTSÜBA OJANG****Tzüpokdak**

(n) Tzü apokdak, tzü adok tenzükdak (source of water)

* Tzüpokdak tesem nung arem mesamatsütsüla.

Tzüpu

(n) tajemtzü tzü atsüngdendaktsütsü asoshi atuba tesem (well)

* Yim ajak nung yimküüm tzüpu wazüka ayutsüla.



Tir Yimyim

OLONG PAITEP # 7416

	1				2	3			
4			5						6
						7			
	8								
	9			10			11		
						12			13
14									
						15			

TIPIEN		LANGTSÜNGLEN	
2. Sü jeplok	-(4)	1. _____ i	-(4)
4. O agi merenshi	-(5)	3. Kasa masü	-(6)
7. Ayongküüm li	-(5)	5. Nüchi masü	-(5)
8. Chiyungtsü mapang süiadok	-(4)	6. Tashi endok	-(5)
9. Tsüngrem den jembiba	-(9)	9. Langtem	-(5)
12. Saklok	-(4)	10. Anü malidang	-(6)
14. Samaba mebushitet	-(5)	11. _____ kibur	-(5)
15. Mejanga onü	-(5)	13. Tebur tembar tsüngda jatepba	-(4)
16. Tzü shiruru ka	-(4)		

OLONG PAITEP # 7415 TELANGZÜBA

TIPIEN :	LANGTSÜNGLEN :
2. Pongsen, 5. Lepko, 7. Omen,	1. Alimang, 2. Pongen, 3. Samaru,
8. Maongka, 10. Yangkhu,	4. Nün, 6. Pio, 9. Nüngdak,
12. Senpong, 14. Angu, 15. Raksa,	10. Yongya, 11. Kongro, 13. Ora,
16. Arameso.	14. Ata.

NAI-A YA METETTER

India nunger asayar Pramod Bhagat-i BWF Para World Championships nung tebur SL3 category nung gold medal anguba sülen pai otsü tasen ka yangluogo. Final nung pai Indonesia nunger asayar Muhammad Al Imran akok. Bhagat-i ajak senteper world title trok benogo. Honibarnü takok anguba sülen pai China nunger nüngtugu asayar Lin Dan ajateta otsü tasen yangluogo, shibai able-bodied badminton nung world titles pongu bena liasü.

Kaketshiri gas detection system atema jury award angu**Shillong, February 15, 2026**

(Agencies): Meghalaya kübok East Khasi Hills district nungi class 9 kaketshir kati jury award ngua state asoshi konang bentsür aruogo.

Iba kaketshiri smart gas leak detection system yangluba atema North East Science Fair & Innovation Festival 2026 nung sempet agütsü.

Pa ya James Donald Kharkongor lir aser Mawngap District Christian Multipurpose Higher Secondary School nung azünger.

National Council of Science

Museums unit ka National Science Centre Guwahati ajanga regional sentong ayongzüka nung pai iba sempet angu.

James ya East Khasi Hills kübok Laitpynter Synrangaban nunger lir aser pai "Smart LPG Safety and Hazard Prevention System" yanglu.

Iba system ajanga gas leaks puteter aser preventive measures tenzüker.

Iba system nung advanced sensors ajanga air quality repranger. Kodang gas levels ji safe limits adena tudir alarm

asar aser gas belenshitsü atema exhaust fan ka tsükloker.

Iba mapatong nung IoT-based alert mechanisms aser automatic solenoid valve enoksema lir aser iba ajanga gas supply pa sasa shibanger.

Shillong Science Centre nungi Innovation Hub ajanga James nem shisatsü aser technical support agüja liasü.

Anogo pezünü North East Science Fair and Innovation Festival 2026 ya February 11 nungi 14 tashi Guwahati nung National Science Centre nung ayonga amung.

NE nung mezüngbuba fish canning plant Mizoram nung lapokogo**Aizawl, February 15, 2026**

(Agencies): Northeast nung mezüngbuba fish canning facility Mizoram nung February 13, 2026 nü lapokogo aser iba ajanga agro-based industrialization ajungkettsü.

Mamit district kübok Zawlnuam nung iba plant amenok aser farm-to-market linkages akangshiba den angu metsürtem senotsü angutsü maongka agütsütsü imlar.

Iba plant ya Fisheries, Agriculture, Irrigation and Water Resources Minister Lalrinliana Vanlalruata-i ashü.

Iba mapatong ajanga angu metsürtemi raw fish ayokba dang masü saka package fish yoktettsü. Iba plant nung modern preservation aser canning techniques amshir aser iba ajanga jenjang tajungba agi ayoktsü.

"Iba plant ajanga shishilembatsü lenmang tasenten lapoktsür. Iba plant nung quality control aser consumer-oriented maparen alitsüla" ta Minister Lalrinliana Vanlalruata-i ashü.

"State sorkari aluyimertem aser food processing industries indang infrastructure

akangshitsü tenangzüka lir. Iba asalentong nung Zamuang village nung nut processing unit ka amenoktsü aser Mamit nung palm oil cultivation ulushitsü sentongtem lir" ta paisa ashi.

Mizoram nung Cooperation Department-i July 2024 nung Centre dangi fish canning project bena liasü.

Iba mapatong ya Integrated Cooperative Development Project (ICDP) kübok senotsü teyari agütsür aser Rs 65 lakh endoka yanglu. Iba nung machinery atema Rs 40 lakh aser construction atema Rs 25 lakh lemezütsü.

Dholai nung Yaba süngjang 1.1 lakh apu; Nisung 2 pua lir**Guwahati, February 15, 2026**

(Agencies): Assam Police-i Cachar district nung truck gari ka nung Yaba süngjang 1,10,000 puogo aser iba dak sendakba nung nisung 2 apu.

"Pills ajakibo maneptür, kari mesüzüker aser onoki

memesükdaktsütsü inyaker. Dholai PS kübok Yaba süngjang 1,10,000 puogo. Truck gari ka apu aser nisung ana apu" ta Chief Minister Himanta Biswa Sarma-i ashü.

Dholai Police-i osang tejangja angazükba nung ajemdaker mita

aodang Yaba süngjangtem apu.

Assam sorkari # Assam Against Drugs campaign kübok zero-tolerance policy inyaker. Iba ajanga tesüba küm ishika tsüngda drugs aser nisung aika puogo ta Chief Minister Sarma-i ashü.

US-i tenokdangba agienra onoki atsüanem akatsü renema lir: Iran

Tehran, Tsüklai/February 15 (Agencies): America nungeri tenokdangba agüja aliba agientsü asoshi jembishinü akatsü mulungra Iran-i nuclear deal ka yanglutsü atema atsüanem akatsü renema lir, ta Iran indang deputy foreign minister Majid Takht-Ravanchi-i BBC dang ashi.

America nungeri tezüngzüktep ka aginer ta kuli kuli sayutettsü par dak keta lir, ta Iranian minister-i ashi. "Parnoki shidakba nung temulung agütsüra, temetet tezüngzüktep ka agitettsü," ta pai ashi.

Kasa mapang US Secretary of State Marco Rubio-ibo nuclear nok-nü amshitsü Iran dang kodanga memelatsü aser tang tashi Tir Donald Trump-i Tehran den yimtenren tsütsü nungi tangatettep kati aruba aginer, ta shia liasü.

"Iran kodanga nuclear nok-nü mamshidaktsütsü. Ibaji tejangja lir. Nuclear nok-nü aliba Iran ji region aser alima security

asoshi timtem tulu lir ta Washington mapang talangka nungi tangatetba kasa nung lir," ta Rubio-i ashi.

Taoba mapang Iran-i America nunger tejangraba amaktsü mulunga aliba sayuba mechi United States-i region nung mitkar tashi anepalur, ta pai ashi.

Middle East nung United States mitkar tashi ulushia ano US aircraft carrier tanabuba yokogo ta osang angazükba mapang Rubio-i iba o ya ashi.

Iranian nuclear deal ya July 2015 indang lir, aser iba mapang Joint Comprehensive Plan of Action (JCPOA) ya Iran aser United States densema alima nung tashi tulu linük balala tsüngta zülutepa Tehran indang enrichment level ya shilem 3.67 nung züngzüketsü aser uranium stockpile ya 300 kilograms tashi dang mela. Ajisüaka 2018 küm US Tir Donald Trump-i iba accord nungi US agiena iba tezüngzüktep ya raksa.

Nuclear deal mechi ano United States aser Iran ya Mongulbarnü Geneva, Switzerland nung jembishinü akatsü imlar.

Iba senden nung US special envoys Steve Witkoff aser Jared Kushner adentsü imla lir.

"Tezüngzüktep ka yanglutsüla, aji mesüra Iran asoshi timtem tulu asütsü, aser ni ibaji mesüdaktsüner... Parnoki deal ka meyanglura, ibaji otsü balaka asütsü. Yashi Israel Ato Kilonser Benjamin Netanyahu den senden tajung ka menogo," ta Trump-i Brehostibarnü shia liasü.

Iran aser United States ya taoba mapang nuclear ken o jembia 2025 küm April ita Muscat, Oman aser Rome, Italy nung senden mena liasü.

Kasa mapang Kremlin otongtar Dmitry Peskov-ia Ukraine, Russia aser US tsüngta senden Geneva nung February 17-18 anogo nung amentsü ta sangdongogo.

Israel nunger sepaitemi Gaza nung Palestine nunger teku tepset

Cairo, Tüklai/February 15 (Agencies): India nunger sepaitemi Gaza kübok tesem balala nung Palestine nunger teku tepsetogo, koba United States teyongtsüi ia October ita ceasefire yangluba anema lir.

Israel military-i southern Lebanon nung tesem balala amakba mapang Deobarnü Gaza nunga tesem kar makogo. Israel military-i ashiba agi Lebanon nung ya parnoki Hezbollah pur indang warehouse tem maka liasü.

Gaza nung Nasser Hospital nungi source kati Al Jazeera dang ashiba agi, Israel nunger sepaitemi Khan Younis yimti nung Palestine nunger pongu tepseta liasü.

Sepaitemi "yellow line" adena or tesem balala maka liasü. Gaza kübok yellow line nung ya Israel nunger sepaitem amendaka lir.

Tanga Palestine nunger pezü

ya Israel nunger sepaitemi northern Gaza kübok al-Faluja tesem nung pei ki toktsür alitem indang süki ka amakba mapang tepset, ta al-Shifa Hospital source ka ajanga metetdaksü.

Ken o dak sendakba nung Israel-i kecha telangzüba magütsü.

Ajisüaka Israel military-i Deobar anepdang, parnoki northern Gaza nung telungpurtem senoka aiba ki ka amak ta ashi, saka koba tesem nungar iba indang osang tejangja magütsü.

Iba tesem amakba mapang telungpur ana tepset, ta parnokisa metetdaksü.

Israel military-isa, parnoki Deobarnü Gaza nung ano nisung ka tepsetogo, shibai yellow line adena ait aser sepaitem atema amokmeren ka liasü.

Ajisüaka parnoki pa tepsetba kuli tejangja magütsü.

Lebanon nung Israel

military-i ashiba agi, parnoki Hezbollah-i prangbong injang aser launcher tem rezünga ayuba warehouse tem makogo.

Israel military aser Hezbollah nati 2024 küm November ita ceasefire benoktsü atema nangzüktepba liasü. Gaza nung Palestine nungertem pusema Hezbollah pur northern Israel amak tenzüka sülen mapang tatsü ka rarar ceasefire ya benoka liasü.

Deobarnü tesem balala amakba dak sendakba nung Lebanon nungi kecha telangzüba magütsü.

Gaza aser Lebanon nungi ketdangsürtemi ashiba agi, rara anentsü atema nangzükteper liaka Israel military-i anogoshia amai tesem balala amaker.

Gaza nung Israel-i ceasefire anema 1,500 dak temaben jenjang agiogo. Iba mapang nisung 591 tepset aser nisung 1,590 yiruja liasü.

?Coordination of Humanitarian Affairs-i metetdaksü.

Madagascar nung sorkari national emergency ka sangdongogo, aser ashiba agi, yipru yagi USD million 142 alang teraksatsüba bener arutsüogo.

Nisung asüba den külemi iba lendong nung nisung 427 yiru aser nisung 16,300 shi pei talidak ki toktsür jenshia aotsüsa aküm.

Yipru ya Mongolbarnü Madagascar nung yimti tulutiba rongnung tanabuba Toamasina süia ao, kong nisung 400,000 shi alir.

Linük lenir Colonel Michael Randrianirina-i ashiba agi, yipru yagi yimti shilem 75 bo raksatsüogo.

Menungra Bilemteter



ASÜR MATSUNGSHIBALKR. CHANGTONGYA.
TASÜBA ANOGO : 16.02.2025

Anjong memeshidang na onok nungi pila oaka nü tsügnep tajem tanü tashi onok mulungjang nung makonger, alimar nük agi na monguaka onok mulungjang nung na ano taküm ali ama teti nükilai arur aser onok mulung nungi kodanga pilaa maoyer.

Na onok nungi pila liaka kenu kodanga mepilaba lima nung ajurutsü yimlar.
~ Temeim Kinungtsü, Oja, Oba, Oya nenu, aser Kinungertem.

Menungra Bilemteter



ASO :
28.12.1982

ASÜ :
16.02.2023

ASÜR. WB. TEMJENLIBA LKR, CHANGTONGYA

Na onok nungi pilar küm asem süia oaka ne Temeim terajem aser tetangshi otem kinungertemi amatsü makoker aser teti menungraa bilemteter.

Aji saka asen teyanglur Tsüngrem tulusangi Pa temeim taochi sayatenya agi molumi kangla nungi atsüteta kümzüker, Pa chir kümdaktsü nung kinungertem ajak peleseta temulung anisüngzüker aser tulusang Tsüngrem tenüng asanger.

Temeim, Tsürapur, Teyi nunger, Teti, Tenu
aser Kinungertem.

TENÜNGSANG AGÜTSÜR

Mopungchuket Senso Mungdang aser Mopungchuket Village Sports Federation ajanga **Wb. Mongsen Longkumer** ajanga 5th India Open International Open Kickboxing Championship, 2026, Tsüklai 4-8, New Delhi nung asayaba mapang tematiba jenjang (Gold Medal) ajangzüktetba atema tenüngsang agütsür.

Iba tematiba jenjang ajangzüktetba ajanga yimer atema dang masü saka Naga nunger ajak tenüng ajungkettsüogo aser ne sempet aser meranga inyakba shisanger. Tarütsü anogotem ne wadang aser sempet Tsüngremi maneni moajang



Sd/-
Nukshitemjen Lemtur
General Secretary
Mopungchuket Senso
Mungdang

Sd/-
Akumyanger Lemtur
General Secretary
Mopungchuket Village Sports
Federation

ALI TAYOKTSU LIR

XELHOZHE nung Aoyim den sentakteba aliba Ali 4 Pura dak tema lir.
Tasazük Mashii angutsü.
94360 02285 Rs. 250 per sq.ft
Contact : 9436404186 / 9612897620

Nigeria north tsütsü telungpuri yimtsüng asem amakba nung nisung 46 süogo

Abuja, Tsüklai/February 15 (Agencies): Prangbong bena Azüdokshi tulutiba ya alirtem motorcycle nung arur Konkoso yimtsüng nung atalok, Nigeria north tsütsü yimtsüng asem nung nisung 46 tepset aser aika pua bener ao ta ashir.

Kwara aser Katsina states den arütsüa aliba Niger State kübok Borgu local government area kübok yimtsüngtem nung iba lendong ya atalok, ta

Honibarnü osang ka ajanga ashi. Azüdokshi tulutiba ya Konkoso yimtsüng nung atalok, kong nisung 38 khaset mesüra tekong rangdaksü.

Iba yimtsüng nung ki timba rongdoktsü aser süogo ta zünger aliba den külemi ano tasü mang tem ngutet, ta osang ajanga ashi.

(Maneni tapak 8 nung...)

Gezani yipru agi Mozambique kongshi; nisung 4 asü

Maputo, Tsüklai/February 15 (Agencies): Gezani yipru agi Mozambique kübok tzüküm nung aliba Inhambane province kongshiba sülen nisung pezü tepsetogo, ta ketdangsürtemi metetdaksü.

Kasa yipru yagi Madagascar dak kanga mejungi kongshia nisung 41 tepsetba sülen anogo ka lir Honibarnü iba yipru yagi Mozambique daka kongshia nisung tepsetba den teraksatsüba bener arutsüogo.

Meteorologists temi ashiba agi, Inhambane tesem nung mopung 215km per hour (134mph) ona liasü, ta AFP news agency-i metetdaksü.

Mopung tesashi aonba sülen süngtong aser power line tem

raksatsü aser iba ajanga nisung 13,000 dak tema power makai aküm, ta national electric company-i ashi.

Kasa mapang nung Inhambane yimti kübok tesem aika nung tzü supply daka kongshia liasü. Iba yimti nung nisung 100,000 shi alir.

Mozambique ya tsüngsang mopung dak sendakba lendong balala agi aiben kongshia arudar, aser scientist temi ashiba agi, iba ya tzü mopung melenshiba ajanga lir.

Taoba hopta ishika tsüngda iba linük nung tzümetsüng agi nisung 700,000 tema dak kongshi aser ki 170,000 dak tema raksaja liasü, ta United Nations Office for the

T20 World Cup: West Indies-i Nepal koka Super 8s tongogo

Tsüklai/February 15, 2026 (Agencies): Deobarnü T20 World Cup nung West Indies-i wicket 9 agi Nepal koka Super 8s tongogo. Iba asayamung nung Nepal-i asaya ka danga koka mali.

Scotland aser England na koka asayamung kanga junga tenzükba sülen T20 World Cup anaben koker aliba team yagi Deobarnü Mumbai kübok Wankhede Stadium nung maneni kanga junga asaya-a asaya tasembuba kokogo.

Nepal-i run 134 dang yangluba sülen West Indies puri power play nung asayar

ka out ser run 44 yanglu. Parnok rongnungi opener Brandon King dang out süa liasü.

West Indies captain Shai Hope-i ball 38 nung half century ka yanglu aser out mesüi run 61 yanglua team takok dangi ani. Pa nem Shimron Hetmeyer-ia teyari tulu agütsü, shibai out mesüi ball 32 nung run 46 yanglua liasü. Iba asaya ya parnoki ball 28 anunga lia koka liasü.

Toss mekoki mezüing batting amentsü atema yokba sülen Nepal team shirnoki asaya ka danga koka mali,

parnoki asaya junga metenzükteni liasü.

Powerplay nung West Indies puri bowling kanga junga aonba den fielding kanga junga amenba sülen parnoki asayar 3 out ser run 22 dang yanglutet. Parnok rongnungi Dipendra Singh Airee-i dang run telong junga yanglu. Pai run 58 yanglu aser asaya tatemlen Sompal Kami-ia out mesüi run 26 yanglua liasü.

West Indies atema Jason Holder-i run 27 agütsür run 4 yanglua liasü. Parnok group-stage nung tatembangbuba asaya Italy den asayatsü.

Manuel Neuer temola yirur masayatettsüsa kümogo



Tsüklai/February 15, 2026 (Agencies): Bayern Munich captain Manuel Neuer temola yiruogo, aser pa kobika masayatettsü mejangja, ta club sangdong ka ajanga Deobarnü metetdaksü.

Arishi küm 39 tain asayar ya Honibarnü Bundesliga nung Werder Bremen goal 3-0 agi akokba asaya nung half-time nung tuguatok. Iba asaya akokba sülen Bayern pur Borussia Dortmund dang nungi point trok agi timba kümogo.

Asaya tembangba sülen sporting director Max Eberl-i, Neuer melenba ya kümdangshia atatsü atema jenjang agiba ka aser kecha taoksatsü mali, ta ashi. Ajisüaka medical tetendangba balala agiba sülen pa temola yirur aliba nguteta liasü.

Bayern-i sangdong ka ajanga parnok tang atemabo Manuel Neuer medeni asaya atatsü ta ashi, saka pa kobika masayatettsü iba indang osang tejangja magütsü.

German media sangdong balala ajanga ashiba agi, Neuer ya iba ita tatemlen Bayern pur Dortmund den asayatsü aliba aser taruba hopta Eintracht Frankfurt den asayatsü aliba asaya nung masayatettsü.

Neuer, shiba March ita arishi küm 40 ajungtsü, pa temola yiruba ajanga taoba season asaya 10 tashi masaya aser tanga kasa timtem adokogo.

Kasa mapang nung Bayern pur Khristmas mapang tashi nungbo point 11 agi timba liasü, saka Dortmund puri parnok point trok agi dang memenep kümogo.

Pereira Nottingham Forest coach kümogo



Tsüklai/February 15, 2026 (Agencies): Nottingham Forest puri ita 18 atema Vitor Pereira den tenangzüktepba ka yangluogo. Arishi küm 57 tain Pereira ya tang asaya aliba season nung club indang coach pezübuba kümogo.

Portugal nunger coach yagi Sean Dyche melenogo, shiba Brehostibarnü mapa nungi anenja liasü. Pa mapa tongtibangtiba kaji Forest pur Premier League nungi relegat mesüdaksütsüba asütsü.

Parnoki tang tashi nung point 17 ngua lir aser point asem agi

dang relegation zon-i mai lir. Parnoki taoba asaya ter nung asaya ana dang koka liasü.

Pereira lenisüba nung Forest pur mezüingbuba asayaji Brehostibarnü Turkey nung Fenerbahce den Europa League knockout round play-off asayatsü, aser iba sülen February 22 nü Premier League nung Liverpool den asayatsü.

Pereira ya ita 11 inyakba sülen Wolves puri November ita mapa nungi anentsü aser tang ano England-i meyipa aruogo.

Nuno Espírito Santo, Ange Postecoglou aser Dyche

nungeri club toktsüba sülen tang pa shimogo.

Bodhbarnü league bonglang nung aliba Wolves team den goal kaka danga magütsü asaya tembangba sülen Dyche ya mapa nungi anenja liasü.

Pereira, shiba lenisüba nung Wolves puri asaya 38 nung asaya 14 koka taoba season team relegat mesüdaksü, pa taoba mapang Forest kibur Evangelos Marinakis den Greek club Olympiacos nung inyaker asünung pa iba mapa asoshi asadangertem rongnung temaba jenjang nung liasü.

Pai 2014-15 season nung Greek Cup akok aser iba sülen Fenerbahce-i oa liasü.

Pereira ya Wolves nung 2024 küm December ita aden, saka ita asem tejakdang pa mapa nungi anentsüogo. Club-i asaya 10 nung point ana dang anguba sülen pa mapa nungi anenja liasü.

Pa coach mapa ya mezüingbuba 2004 küm Portuguese club Sanjoanense nung inyak aser iba sülen Germany, China, Brazil aser Saudi Arabia nung inyakogo.

Pereira indang coaching staff nung Filipe Jorge Monteiro Almeida aser Luis Miguel Moreira Da Silva nunger densema lir.

Real-i Sociedad akokba asaya nung Arnold-ia assist ka sütsü

Tsüklai/February 15, 2026 (Agencies): Ita ana dak tema masayai lir Real Madrid puri Real Sociedad akokba asaya nung mezüingbuba asayaba mapang Trent Alexander-Arnold-i assist ka süja liasü. Iba asaya akokba sülen Real pur La Liga nung temaba jenjangi tuogo.

England nunger international asayar ya tepi yiruba sülen December aser January ita masayai liasü. Real puri asaya tibuba atonga akokba asaya nung Arnold-i asaya tenzüker minute pongu tsüingda Gonzalo Garcia nem ball ka kanga junga

agüja parnoki mezüingbuba goal idaktsü.

Ajisüaka minute 21buba nung Sociedad atema Mikel Oyarzabal-i penalty ka idakja goal kasasa aküm.

Minute pezü dang lir Jon Aramburu-i box telung nung Vinicius Jr alangdaksüba sülen Real Madrid-ia penalty ajanga tanbuba goal idaktsü.

Iba sülen minute trok dang lir ano Federico Valverde-i Alex Remiro adena ball kanga junga metsüokja asaya mezüingbuba shilem tembangba mapang tashi nung Real pur tejakdang liasü.

Asaya tanabuba shilem

tenzüker minute 48buba nung ano Vinicius-i penalty ka idaktsü, koba pa asoshi tang asaya aliba season nung goal 10buba liasü.

Iba asaya akokba tetezü Real Madrid pur Barcelona dang nungi point ana agi timba kümogo, shirnok Hombarnü Girona den asayatsü lir.

Maneni Real Madrid pur Mongolbarnü Champions League play-offs nung kidang Benfica den asayatsü.

Kasa mapang nung Real Sociedad pur Honibarnü La Liga nung Real Oviedo den asayatsü.

BENDANGLI OSANG : Tapak 7 nungi...

Nigeria north tsütsü telungpuri...

Konkoso nung alir kati osangbener dang ashiba agi, prangbong bona alirtemi anasa Tungar Makeri yimtsüing mezüing ama aser iba sülen par yimtsüing amak.

Nigeria north tsütsü security tebilemtsü kanga benjar aliba mapang iba lendong ya ataloker, kong ISIL (ISIS) den sendaktepa aluba telungpur teloktem lir aser telok balalai nisungtem pua bener oa parnok alangzüktsü senotsü meshir.

Niger State police odongtar Wasiu Abiodun-ia yimtsüing ka nung amakba jangjatsüogo.

"Bandits temi Tunga-Makeri yimtsüing amak. Nisung trok takum sama, ki kar rongdoktsü aser kwi pua bener aoar mejangjateti lir," ta pai ashi.

Konkoso nung alir

Jeremiah Timothy-i osangbener dang ashiba agi, lendong agütsür ya Honibar anepdang 6:00 ako (par mapang) meta yimtsüing telungi aita tapi agi injang khaloktsü.

Niger aser Kwara states tsüingta arütsü nung Kainji Forest lir, kong armed group Boko Haram densema bandits aser telungpur telok balala jenoka alir.

Taoba küm October ita Kwara State nung Woro anasa amakba tenüing al-Qaeda den sendaktepa aliba Group for the Support of Islam and Muslims (JNIM) teloki agia liasü.

Niger State kübok Borgu area nung aliba lenirtemi taoba hopta Tir Bola Tinubu dang azüdokshi tatem kumdarktsütsü atema parnok alidak military basen ka amenoktsü ayongzuka liasü.

BILEMDANGANG

"Anepdang ghonda ka samadaktsüra, na anogo piyong ibaji bushitsü."